

## DOMINGU VI TEMPU KOMÚN – TINAN A

### Tema

Liturjia ohin nian garante ita katak Maromak soi projetu salvasaun atu ema bele to'o ba moris nakonu no propoin mai ita reflesaun ida kona-ba atitude ne'ebé ita tenke asume iha projetu ne'e nia oin.

Iha *segunda leitura*, Paulo apresenta projetu makso'in Maromak nian (ne'ebé nia hanaran "Maromak nia matenek" eh "mistériu). Ne'e mak projetu ida Maromak prepara hori uluk kedas "ba sira ne'ebé hadomi Nia". Ne'ebé haksumik ba ema sira nia matan, maibé Jezús Kristu mak hatudu sai ho ninia An rasik, Ninia liafuan sira, ninia jestu sira, liuliu ho Ninia mate iha krús (basá iha ne'ebá, iha don totál moris nian, mak hatudu sai sasukat Maromak nia domin nian no hatudu ba ema dalan ne'ebé lori ba realizasaun tomak).

*Primeira leitura* fó hanoin kona-ba ema ne'ebé livre atu hii entre proposta Maromak nian (ne'ebé lori ba ksolok) no autosufisiénsia ema nian (ne'ebé kuaze nafatin lori ba mate, desgrasa). Atu tulun ema ne'ebé hili moris, Maromak propoin "ukun-fuan sira": "sinál sira" ne'ebé Maromak uza atu delimita dalan ne'ebé lori ba salvasaun.

*Evanjellu* kompleta reflesaun, hodi propoin atitude baze ne'ebé ema tenke iha hodi la'o tuir dalan ne'ebé "ukun-fuan sira" tau ninia baliza: la'ós kumpre regra esterna de'it, iha respeitu ba liafuan ida-adik hakerek iha lei; maibé asume atitude interiór loos adezaun nian ba Maromak no ba Ninia proposta sira, haktuir iha moris konkretu loroloron nian.

### LEITURA I – Sir 15, 16-21 (15-20)

Livro Ben Sira nian (iha Bíblia Katólíka hanaran ho "Eclesiástico") mak livru "sapiensiál" ida – katak, livru ida ho objetivu atu apresenta indikasaun ho karákteer prátiku, foti husi reflesaun no esperiénsia, kona-ba arte mrois di'ak, iha ézitu, sai haksolok. Nia autór mak Jesus Ben Sira, judeu tradisionál ida, ne'ebé konvensidu katak Torah ne'ebé Maromak fó mak matenek nia hun. Ita iha inísiu sék. II mK; kultura grega ne'ebé tama iha Palestina (husi 333 mK, bainhira Alexandre husi Macedónia ukun) amesa kultura, fiar no valór tradisionál sira Israel nian. Sira ne'ebé foin-sa'e liu abandona bei-ala sira-nia fiar, tanba monu ba babeur kultura elenístika nian...

Jesus Ben Sira hakerek atu tulun israelita sira komprende sira-nia fiar no kultura ninia superioridade, atu keta lakon identidade nu'udar Maromak nia Povu. Nia apresenta sínteze ida relijiaun tradisionál no matenek Israel nian, nune'e hatudu katak kultura judaika la lakon ho kultura grega.

Iha kapitulu 14 no 15, ita hetan reflesaun kona-ba oinsá hetan ksolok loos. Iha kontestu ida-ne'e mak ita situa testu ohin nian.

### MENSAJEN

Tema opsaun entre dalan rua – dalan moris no ksolok nian no dalan mate no desgrasa nian – mak tema ida hetan iha teolojia tradisionál Israel nian. Ba teólogo deuteronomista sira, ne'e mak kestaun boot ne'ebé kondisiona sentidu moris ema nian no sentidu istória nian: se ema hili dalan foti-an no autosufisiénsia nian, dook husi Maromak no ukun-fuan sira, nia prepara futuru ida mate no desgrasa ba nia an no ba comunidade; maibé se ema hili moris iha "hamta'uk" ba

Maromak no respeitu ba Jahwéh nia proposta sira (ukun-fuan sira), nia harii futuru ida ksolok nian, soin nian, dame nian ba nia no ba nia Povu. Kestaun ne'e ita hetan esprime didi'ak iha Dt 30,15-20.

Matenek-na'in sira Israel nian hatene husi istória no esperiénsia rasik katak, bainhira sira respeita Maromak nia indikasaun sira, Povu harii sosiedade fraterna, livre, solidária, iha-ne'ebé hotu-hotu respeita malu no soi buat nesesáriu atu moris ho forma ekilibrada no ksolok; maibé bainhira Povu hili hadook an husi Maromak no nia proposta sira, nia harii egoísmu, esplorasau, divizaun, nune'e loris terus, privasaun, mate (ezemplu ezíliu iha Babilónia).

Iha testu ne'e, Jesus Ben Sira pretende tau iha ema sira nia oin, ema sira nia tempu nian ne'ebé husik valór fiar nian iha opsaun fundamentál ne'ebé liberdade oferese ba sira: moris no mate, ksolok no desgrasa.

Maromak respeita ema nia liberdade. Tuir Ben Sira, ema la'ós robot ida ne'ebé Maormak liga eh desliga no botaun komandu nian; maibé ema kriatura livre, ne'ebé halo ninia hilin sira no ninia destinú iha ninia liman rasik. Maromak hatudu ba ema dalan sira atu to'o ba moris no ksolok; maibé Nia respeita opsaun ne'ebé ema halo. Depende ba ema atu hili no harii ninia destinú: ho Maromak eh kontra Maromak; destinú ida moris no ksolok nian eh destinú ida mate no desgrasa nian.

## **LEITURA II – 1 Cor 2, 6-10**

Ita kontinua iha ambiente comunidade kristán Corinto nian no ho tema matenek/sabedouria loos nian. Ema Corinto nian halo fiar sarani hanesan fali dalan filozófiku ida, hanesan eskola filozófika grega sira ho ninia mestre sira (ba balun Paulo, ba seluk Pedro, seluk fali Apolo). Nune'e sarani sira Corinto nian, iha risku atu halo fiar sai ideolojia ida ne'ebé forte tuir kualidade pesoál ninia mestre sira nian. Paulo konxiente katak, Kristu mak mestre ida mesak no sabdouria loos la mai husi liafuan matenek sira eh koerénsia sistema filozófika nian, maibé husi krús.

Depoizde denunsia sarani Corinto nia pretensaun atu hetan iha ema sira proposta sabedouria nian atu to'o ba moris nakonu, Paulo apresenta “Maromak nia sabedouria” ho maneira luan liután.

### **MENSAJEN**

Ba Paulo, ko'alia kona-ba “Maromak nia matenek” katak ko'alia kona-ba projetu salvasaun ne'ebé Nia prepara ba umanidade (iha testu seluk, Paulo uza kosenitu “mystêrion” – kf. Rom 16,25; Ef 1,3-10; 3,3.4.9; Col 1,26; 2,2; 4,3). Ida-ne'e planu ne'ebé Maromak prepara horiuluk kedas ba sira ne'ebé hadomi Nia, hodi lori ba salvasaun, ba moris nakonu. Planu ne'e mak rezultadu husi Maromak nia domin ba nia oan sira. Planu ne'e Maromak hatudu sai de'it liuhusi nia Oan-Mane, Jezús Kristu.

Paulo nia leitura kona-ba istória salvasaun nian hatudu momoos buat rua: Maromak hili ita horiuluk kedas no hakarak ita sai santu no sala-laek, atu to'o ba moris rohan-laek, ksolok totál, realizasaun moris nakonu. Tanba ne'e Nia mai hasoru ita, halo aliansa ho ita, hatudu mai ita dalan ba moris no ksolok; no bainhira tempu to'o nia haruka nia Oan rasik, ne'ebé hasai ita husi salan, lori ita ba komuñaun ho Maromak no maun-alin sira. Iha Jezús nia krús, haktuir loloos istória domin ne'e to'o pontu iha ne'ebé Maromak nia Oan saran nia moris mai ita... Oras-ne'e planu salvasaun ne'e kontinua akontese iha fiar-na;in sira nia moris hodi Espíritu nia kbiit: espíritu mak anima ita atu loron ba loron, it amoris nu'udar ema foun, to'o ita identifika an totalmente ho Kristu.

## EVANJELLU – Mt 5,17-37

Jezús nia diskursu “iha foho tutun” lori ita ba foho Lei nian (Sinai), iha ne’ebé Maromak hatudu An no fó Lei ba nia Povu; oras-ne’e, Jezús mak, iha foho ida, oferese ba Maromak nia Povu foun Lei foun ne’ebé tenke gia ema hotu ne’ebé iha interese atu adere ba “Reinu”. Iha diskursu ne’e (ida uluk liu husi diskursu boot lima ne’ebé Mateus apresenta), evanjelista halibur konjuntu Jezús ninia “liafuan sira” no oferese ba comunidade sarani kódigu étiku foun, Lei foun, ne’ebé tenke gia Jezús nia dixípulu sira iha ninia marxa iha istória.

Komunidade Mateus nian mak comunidade ida ho abut judaika forte, katak sarani sira mai husi judaizmu... Kestaun sira ne’ebé comunidade ne’e foti, iha dékada 80 (bainhira Evanjellu ne’e mosu) mak: ita iha obrigasaun atu kontinua kumpre Lei Moisés nian? Jezús la halakon Lei antiga? Sá loos mak buat foun husi Jezús nia mensajen?

### MENSAJEN

Iha primeira parte Evanjellu ohin nian (vers. 17-19), Mateus sustenta katak Kristu la halakon Lei ne’ebé Maromak oferese ba nia Povu iha Sinai. Maromak nia Lei konserva ninia validade no rohan-laek; maibé presiza enfrenta Lei ne’e nu’udar espresaun konkreta adezaun totál ba Maromak. Farizeu sira monu ba monu ba observasaun rigoroza Lei nian no hanoin katak salvasaun mai husi kumre norma konkreta sira; maibé Mateus hanoin katak Jezús nia proposta libertadora husu atu asume atitude interiór kompromisu totál nian ba Maromak no ba Ninia proposta sira.

Iha segunda parte testu testu ohin nian (vers. 20-37), Mateus refere ezemplu konkretu haat kona-ba forma foun atu komprende Lei (iha realidade, iha ezemplu neen ne’ebé mosu iha konjuntu testu Mateus nian; maibé Evanjellu ohin nian apresenta haat de’it; sira seluk ba domingu oin). Dahuluk (vers. 21-26) refere ba relasaun fraterna. Lei Moisés nian ezije de’it, atu la oho (kf. Ex 20,13; Dt 5,17); maibé, iha Jezús nia perspetiva (ne’ebé la’ós de’it kumpre letra hotu Lei nian, maibé ezije atitude interiór foun), ukun fuan la oho ne’e implika evita halo aat tipu naran de’it ba maun-alin sira... Iha forma barak atu harahun maun-alin, atu elimina nia, atu na’ok nia moris; liafuan sira ne’ebé ofende, kalúnia ne’ebé estraga, jestu desprezu nian ne’ebé ezklui, konfrontu sira ne’ebé hakotu relasaun sira. Dixípulu sira “Reinu” nian labele limita an de’it atu kumpre Lei tuir ninia liafuan sira ne’ebé hakerek; sira tenke asume atitude foun, ne’ebé luan liu, ne’ebé lori ba respeitu absolutu ba vida no ba maun-alin sira nia dignidade. Kona-ba ne’e, Mateus aproveita atu apresenta ba ninia comunidade katekeze ida kona-ba urjénsia rekonsiliaun nian (hakotu relasaun ho maluk, hadook nia husi relasaun, tau nia iha ninin, la’ós forma ida oho nian?). Iha Mateus nia perspetiva, rekonsiliaun ho maun-alin tenke mai uluk kultu, se ema ida la hadomi maun-alin sira nia relasaun ho Maromak ne’e bosok de’it.

Daruak (vers. 27-30) refere ba adultériu. Lei Moisés nian ezije atu keta halo sala adultériu (kf. Ex 20,14; Dt 5,18); maibé, iha Jezús nia perspetiva, presiza hakat liu letra Lei nian no ataka problema iha ninia abut – katak, ema ninia fuan rasik... Iha ema nia fuan laran mak mai hakaran laloos ba buat ne’ebé la pertense ba nia; tanba ne’e, iha nivel ida-ne’e mak tenke realiza “konversaun”. Referénsia atu fokit sai tiha matan ne’ebé sai okaziaun ba salan (matan, a kultura ne’e, mak halo tama hakaran sira) eh tesi loman ne’ebé sai okaziaun salan nian (liman, iha kultura ne’e, mak órgaun asaun nian, atu konkretiza hakaran sira mosu iha fuan) mak espresaun forte atu hateten katak presiza atua iha fatin ne’ebé sai orijen, hun ba ema nia hahalok aat sira no elimina ninia buat aat ninia abut sira.

Datoluk (vers. 31-32) refere ba divórsiu. Lei Moisés nian permite mane atu soe nia feen (kf. Dt 24,1); maibé. Iha Jezús nia perspetiva, Lei ne’e tenke korrije: divórsiu la tama iha Maromak nia planu orijinal, bainhira Nia kria mane no feto no bolu sira atu hadomi malu no partilla moris.

Dahaat (vers. 33-37) refere ba kestaun julgamentu nian. Lei Moisés nian husu de'it fidelidade ba kompromisu sira ne'ebé marka ho moruk eh juramentu (kf. Lv 19,12; Nm 20,3; Dt 23,22-24); maibé, iha Jezús nia perspetiva, nesesidade atu jura implika katak eziste klima ida deskonfiansa nian ne'ebé inkompatível ho “Reinu”. Ba ema sira ne'ebé tama iha dinámika “Reinu” nian, tenke iha klima sinseridade no konfiansa nian ne'ebé la to'o hodi dehan de'it “sin” eh “lae”. Forma naran de'it juramentu nian mak buat ida ne'eb'e la serve no hatudu sinál korupsaun dinámika “Reinu” nian.

Kestaun esensiál mak ida-ne'e: ba ema ne'ebé moris iha dinámika “Reinu” nian, la to'o atu kumpre loloos ho modu ríjidu Lei sira; maibé presiza iha atitude interiór foun, kompromisu loloos ho Maromak ne'ebé envolve ema tomak no nakfilak fuan.